

**Muhyiddin Tanding Satu Lawan Satu Dengan Calon PAS Di Pagoh
Bernama
20 April, 2013**

PAGOH, 20 April (Bernama) -- Timbalan Perdana Menteri Tan Sri Muhyiddin Yassin menghadapi pertandingan satu lawan satu dengan pencabar yang sama pada 2008 bagi mempertahankan kerusi Parlimen Pagoh pada pilihan raya umum, 5 Mei ini.

Muhyiddin yang juga Timbalan Pengerusi Barisan Nasional (BN) sekali lagi akan berdepan dengan calon PAS Mohd Rozali Jamil yang ditawarkan beliau pada PRU12.

Pengesahan pencalonan mereka diumumkan Pegawai Pengurus Pilihan Raya Pagoh, Zulkifly Mohd Tahir pada kira-kira pukul 11.50 pagi.

Terdahulu, timbalan perdana menteri menyerahkan kertas penamaan calon beliau di pusat penamaan calon di Kompleks Sukan Pagoh di sini, pada pukul 9.30 pagi, manakala lawannya mengemukakan kertas pencalonan pada pukul 9.01 pagi.

Pada pilihan raya umum 2008, Muhyiddin memperoleh 21,028 undi manakala Mohd Rozali yang merupakan pendakwah bebas, memperoleh 8,447 undi.

Sementara itu, dua kerusi Dewan Undangan Negeri (DUN) di bawah kawasan Parlimen Pagoh turut menyaksikan pertandingan satu lawan satu antara calon BN dan pakatan pembangkang.

Bagi DUN Bukit Serampang, calon BN Ismail Mohamed akan ditentang calon PKR Saadon Abdullah, manakala di DUN Jorak, Datuk Dr Sharuddin Md Salleh (BN) akan berdepan calon Muslimat PAS, Norhayati Bachok.

Ismail yang juga Ketua Pemuda Umno Bakri merupakan muka baharu yang ditampilkan BN manakala Sharuddin ialah penyandang kerusi DUN Jorak.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=943674>